

四庫全書

史部

欽定四庫全書

欽定續通志卷三十一

宋紀七

哲宗

哲宗皇帝諱煦神宗第六子也母曰欽聖后朱氏初名  
傭授檢校太尉天平軍節度使封均國公遷開府儀同  
三司彰武軍節度使進封延平郡王元豐八年二月神  
宗寢疾宰相王珪等請立皇太子并請皇太后權同聽

政神宗許之三月甲午朔皇太后垂簾於福寧殿奉制立帝為皇太子戊戌神宗崩太子即皇帝位己亥大赦及常赦所不原者百官進秩有差遣使告哀於遼庚子尊皇太后曰太皇太后皇后曰皇太后德妃朱氏曰皇太妃以王珪為山陵使甲寅帝同太皇太后聽政己未賜叔雍王顥曹王顥贊拜不名詔邊事稍重者樞密院與三省同議以進庚申進封尚書左僕射鄆國公王珪為岐國公顥為揚王顥為荆王並加太保弟寧國公佖

為遂寧郡王儀國公似大寧郡王成國公侯咸寧郡王  
和國公似普寧郡王以高密郡王宗晟漢東郡王宗瑗  
華原郡王宗愈安康郡王宗隱建安郡王宗緯並為開  
府儀同三司太師潞國公文彥博為司徒濟陽郡王曹  
侁為太保特進王安石為司空餘進秩有差夏四月辛  
未朔元豐六年以前進賦甲戌加李乾德同中書門下  
平章事棟戡檢校太尉詔曰先皇帝臨御十有九年建  
立政事以澤天下而有司奉行失當幾於煩擾或苟且

文具不能布宣實惠其申諭中外協心奉令以稱先帝  
惠安元元之意丁丑召呂公著侍讀諭樞密中書通議  
事都堂庚辰呂惠卿遣兵入西界破其六砦辛巳遣使  
以先帝遺留物遺遼及告即位丁亥復蠲舊年逋賦五  
月丙申詔百官言朝政闕失資政殿學士司馬光過闕  
入見庚戌王珪薨改命蔡確為山陵使戊午以蔡確為  
尚書左僕射兼門下侍郎韓縝為尚書右僕射兼中書  
侍郎章惇知樞密院司馬光為門下侍郎六月丁亥詔中

外臣庶直言朝政闕失民間疾苦秋七月戊戌以資政  
殿大學士呂公著為尚書左丞詔府界三路保甲罷團  
教丙午遼使來弔祭八月己巳鎮江軍節度使韓絳進

開府儀同三司

東都事畧於八月有丙子朔日食之文  
考宋史八月有乙丑己巳癸酉乙亥等

日別朔日不當是丙子即遼史是年八月所書  
有丁卯戊辰之日而亦不言日食知王侁誤也癸酉遣

使賀遼主生辰及正旦九月己酉遣使報謝於遼冬十  
月甲子夏國遣使進助山陵馬罷義倉己卯詔均寬民  
力有司廢格者監司御史糾劾之乙酉契丹神宗皇帝於

永裕陵丙戌罷方田以夏國主母卒遣使弔祭十一月  
辛丑減兩京河陽囚罪一等杖以下釋之民緣山陵役  
者蠲其賦己酉遼使來賀即位十二月壬戌于闐進獅  
子却之辛未左僕射蔡確右僕射韓絳並遷秩加食邑  
楊王顥荆王顥並為太傅壬申章惇司馬光等進秩有  
差甲戌罷後苑西作院乙酉遼使來賀正旦

元祐元年春正月庚寅朔改元丙子慮囚減死罪以下  
二月辛酉以大名河決詔安撫使韓絳振之庚午禁邊

民與夏人為市辛未棟戡卒以其子阿爾魯為河西軍  
節度使邈川首領閏月庚寅蔡確罷以司馬光為尚書  
左僕射門下侍郎詔韓維呂大防孫永范純仁詳定役  
法壬辰以呂公著為門下侍郎丙午守尚書右丞李清  
臣為尚書左丞試吏部尚書呂大防為尚書右丞辛亥  
章惇罷乙卯以吏部尚書范純仁同知樞密院事丙辰  
罷諸州常平管勾官三月乙亥罷熙河蘭會路經制財  
用司己卯復廣濟河輦運辛巳詔民間疾苦當議寬恤



者監司具聞以程頤為崇政殿說書夏四月己丑韓縝  
罷辛卯以諸路旱傷蠲其租壬辰以旱慮囚癸巳王安  
石薨壬寅以呂公著為尚書右僕射兼中書侍郎文彥  
博平章軍國重事黜內侍李憲等辛亥揚王顥荆王顒並  
特授太尉五月丁巳以資政殿大學士韓維為門下侍  
郎罷諸路重祿復熙寧前舊制庚申夏人來賀即位壬  
午詔文彥博班宰相之上六月甲辰呂惠卿落職分司  
南京蘇州居住秋七月乙丑夏國主秉常卒八月辛卯

詔常平依舊法罷青苗錢壬辰封弟偁為祁國公九月  
丙辰司馬光薨己未朝獻景靈宮辛酉大享明堂以神  
宗配大赦丁卯試中書舍人蘇軾為翰林學士知制誥  
己卯張璪罷冬十月丙戌改衍聖公為奉聖公十一月  
戊午以尚書左丞呂大防為中書侍郎御史中丞劉摯  
為尚書右丞庚辰蠲鹽井官溪錢

二年春正月乙丑封東常子乾順為夏國主二月丁亥  
遣左司諫朱光庭使河北賑民被災者詔施黔戎瀘等

州保甲監司免歲閱夏四月丁亥果莊子節烏蘇寇洮東戊子慮囚己丑詔太師文彥博十日一議事都堂辛卯以冬夏旱暵避殿減膳丁酉以四方牒訴上尚書者或冤抑不得直令御史分察之丁未復制科戊申李清臣罷五月癸丑夏人圍南川砦丁卯以劉摯為尚書左丞兵部尚書王存為尚書右丞六月辛丑以安燾知樞密院事秋七月辛亥韓絳以司空致仕夏人寇鎮戎軍詔府界三路教閱保甲復課利場務虧額科罰丙辰罷

諸州數外歲貢戊午遼使來賀坤成節辛未韓維罷八月辛巳  
程頤罷經筵權同管勾西京國子監辛丑涇原言夏人  
寇三川諸砦官軍敗之丁未岷州行營將种誼復洮州  
九月己未夏人寇鎮戎軍冬十月辛卯減西京囚罪一  
等杖以下釋之十一月丙子慮囚十二月黜侍御史王  
巖叟知齊州

三年春正月庚戌復廣惠倉壬申阿爾魯奉表謝罪甲  
戌慮囚二月甲申罷修金明池橋殿乙酉減囚罪一等

徒以下釋之工役權放一年流民饑貧量與應副乙巳  
廣東兵馬監童政坐擅殺無辜伏誅三月丙辰韓絳薨  
乙亥夏人寇德靜砦將官張誠等敗之夏四月戊寅令  
諸路郡邑具役法利害以聞辛巳以呂公著為司空同  
平章軍國事呂大防為尚書左僕射兼門下侍郎范純  
仁為尚書右僕射兼中書侍郎壬午以觀文殿學士孫  
固為門下侍郎劉摯為中書侍郎王存為尚書左丞御  
史中丞胡宗愈為尚書右丞戶部侍郎趙瞻簽書樞密

院事五月癸亥漢東郡王宗瑗薨六月辛丑夏人寇塞  
門砦秋七月戊申荆王顥薨八月己卯進封揚王顥為  
徐王丁酉渠陽蠻入寇辛丑降囚罪一等杖以下釋之  
九月庚申禁宗室聯姻內臣家冬十二月丁酉渝州獵  
人寇小溪閏月癸卯朔頒元祐式甲辰范鎮定鑄律度  
量鐘磬等以進令禮部太常參定是歲天下上戶部主  
戶二百一十三萬四千七百三十三丁二千八百五十  
三萬三千九百三十四客戶六百一十五萬四千六百

五十二丁三百六十二萬九千八十三斷大辟二千九百一十五人

四年春正月甲申以夏人通好詔邊將毋生事二月甲辰呂公著薨三月己卯作渾天儀胡宗愈罷癸巳憲囚夏四月己巳呂大防等以久旱求罷不允丁未曹佺薨壬戌弛在京牧地與民五月辛巳貶觀文殿學士蔡確為光祿卿丁亥復貶英州別駕安置新州六月甲辰范純仁王存罷丙午以趙瞻同知樞密院事戶部尚書韓

忠彥為尚書左丞翰林學士許將為尚書右丞秋七月  
丁丑遼使來賀坤成節庚辰安燾以奴憂去位九月己  
卯朝獻景靈宮辛巳大饗明堂大赦百官加恩有差冬  
十一月癸未以孫固知樞密院事劉摯為門下侍郎吏  
部尚書傅堯俞為中書侍郎十二月庚子遼使來賀興  
龍節

五年春二月己亥夏人歸永樂所掠吏士丁未減天下  
囚罪杖以下釋之庚戌文彥博以太師充護國軍山南



西道節度等使致仕三月丙寅趙瞻薨壬申以韓忠彥  
同知樞密院事翰林學士承旨蘇頌為尚書左丞夏四  
月丙午孫固薨丁巳以旱避殿減膳辛酉以保寧軍節  
度使馮京為檢校司空五月壬申詔差役法有未脩者  
令王巖叟等具利害以聞六月辛丑慮囚七月乙酉夏人來  
議畫界冬十二月辛卯許將罷安康郡王宗隱薨

六年春二月辛卯以劉摯為尚書右僕射兼中書侍郎  
龍圖閣待制王巖叟簽書樞密院事癸巳以蘇轍為尚

書右丞夏四月夏人寇熙河蘭岷鄜延路五月己未朔  
日有食之六月壬辰慮囚秋七月己卯賑兩浙水災八  
月辛卯詔御史臺臣僚親亡十年不葬許依條彈奏及  
令吏部檢察乙卯夏人寇懷遠砦閏月壬戌嚴飭陝西  
河東諸路邊脩甲申刑部侍郎彭汝礪改禮部侍郎九  
月丁亥夏人寇麟府二州壬辰詔州民為寇所掠廬舍  
焚蕩者給錢帛踐稼者賑之失牛者官貸市之壬子減  
天下囚罪一等杖以下釋之冬十一月乙酉劉摯罷壬

辰作元祐觀天厯尚書右丞蘇轍罷知絳州辛丑傅堯  
俞薨

七年春正月甲辰以遼賀正且使耶律迪卒輟朝一日  
三月己亥慮囚夏四月己未立皇后孟氏五月丙午王  
巖叟罷知鄭州六月辛酉以呂大防為右光祿大夫蘇  
頌為尚書右僕射兼中書侍郎韓忠彥知樞密院事蘇  
轍為門下侍郎翰林學士范百祿為中書侍郎翰林學  
士梁燾為尚書左丞御史中丞鄭雍為尚書右丞戶部

尚書劉奉世簽書樞密院事戊辰渾天儀像成秋七月  
庚戌宗室總麻以上者禁析居八月丙辰罷監酒稅務  
增剩給賞法己未詔西邊諸將嚴備毋輕出兵乙亥戒  
邊將毋掣克軍士前陷交趾將吏蘇佐等自拔來歸冬  
十月丁卯夏人寇環州十一月辛卯朝獻景靈宮壬辰  
饗太廟癸巳祀天地於圜丘大赦百官加恩有差民罹  
親喪者戶以差等與免徭辛丑賜徐王顥制履上殿十  
二月辛亥阿爾魯李乾德加食邑實封

八年春正月甲申蔡確卒庚寅詔復范純仁大中大夫二月壬子詔刑部不得分禁繫人數瘦死數多者申尚書省三月甲申蘇頌罷辛卯范百祿罷夏四月丁未夏人來謝罪願以蘭州易塞門皆不許癸丑詔恤刑五月己丑慮囚辛卯監察御史董敦逸黃慶基以論蘇軾蘇轍罷為湖北福建轉運判官六月戊午梁燾罷秋七月丙子以觀文殿大學士范純仁為尚書右僕射兼中書侍郎八月壬戌遣使按視京東西河南北淮南水災癸亥

減京師囚罪一等徒以下釋之戊辰大赦九月戊寅太  
皇太后崩庚辰遣使告哀於遼甲申命呂大防為山陵  
使冬十月戊辰徐王顥乞解官終喪詔不允庚午復內  
侍劉瑗等六人十一月丙子始御垂拱殿十二月乙巳  
范純仁乞罷不允甲寅倣唐六典修官制丁巳遼使來  
弔祭以章惇為資政殿學士呂惠卿為中大夫

紹聖元年春二月丁未以戶部尚書李清臣為中書侍  
郎兵部尚書鄧潤甫為尚書右丞己酉築宣仁聖烈皇

后於永厚陵癸亥減兩京河陽鄭州囚罪一等民緣山陵役者蠲其賦三月壬申朔日有食之乙亥呂大防罷戊子以徐王顥為太師徙封冀王癸巳賑京東河北流民貸以穀麥種仍蠲其租蘇轍罷夏四月丙午以旱恤刑已酉詔中外決獄壬子落蘇軾職知英州癸丑改元甲寅以王安石配饗神宗廟庭蔡確追復右正議大夫庚申減四京囚罪一等杖以下釋之壬戌以資政殿學士章惇為尚書左僕射兼門下侍郎范純仁罷丁卯詔

諸路復元豐免役法戊辰同修國史蔡卞請重修神宗  
實錄閏月壬申復提舉常平官癸酉罷十科舉士法甲  
申以觀文殿學士安燾為門下侍郎丙戌復義倉丙申  
命左僕射章惇提舉修神宗國史五月辛亥劉奉世罷  
乙丑鄧潤甫卒丁卯嗣濮王宗暉薨六月壬午封高密  
郡王宗晟為嗣濮王癸未以翰林學士承旨曾布同知  
樞密院事甲申除進士引用王安石字說之禁秋七月  
丁巳奪司馬光呂公著贈謚王巖叟贈官貶呂大防為祕



書監劉摯為光祿卿蘇轍為少府監並分司南京梁燾  
提舉舒州靈仙觀戊午詔大臣朋黨司馬光以下各輕  
重議罰布告天下餘悉不問議者亦勿復言九月癸卯  
遣御史劉拯按河北水災賑饑民庚戌罷廣惠倉丁卯  
詔京東西河北賑恤流民冬十一月己亥復八路差官法  
二年春二月乙亥貶呂大防分司南京安州居住辛巳  
出內庫錢帛助河北賑饑三月己亥宗晟薨夏四月壬  
申封華容郡王宗愈為嗣濮王秋八月壬申封彰信軍

節度使宗景為濟陰郡王開府儀同三司甲申宗愈薨  
九月甲午以安定郡王宗綽為嗣濮王戊申加上神宗  
謚曰紹天法古運德建功英文烈武欽仁聖孝皇帝已  
酉朝獻景靈宮庚戌朝饗太廟辛亥大饗明堂大赦冬  
十月甲子鄭雍罷以吏部尚書許將為尚書左丞翰林  
學士蔡卞為尚書右丞辛巳進封冀王顥為楚王十一  
月乙未安燾罷知河南府丙辰贈蔡確為太師  
三年春正月庚子韓忠彥罷知真定府戊午詔罷合祭

間因大禮之歲夏至日躬祭地祇北郊二月癸亥出元  
豐庫緡錢於陝西河東糴邊儲癸酉罷富弼配饗神宗  
廟庭癸未詔封濮王子未王者三人宗楚為南陽郡王  
宗祐景城郡王並開府儀同三司宗漢為東陽郡王乙  
酉宗綽薨丁亥夏人寇義合砦三月癸巳圍塞門砦已  
亥封宗楚為嗣濮王辛亥封大寧郡王必為申王遂寧  
郡王佶端王丙辰慮囚秋七月甲寅令熙河立王韶廟  
八月辛酉夏人寇寧順砦有五色暈下有五色氣己卯

復置檢法官庚辰貶范祖禹為昭州別駕賀州安置劉  
安世新州別駕英州安置九月壬子楚王顥薨乙卯廢  
皇后孟氏冬十月壬戌夏人寇鄜延陷金明砦戊辰詔  
被邊諸路相度城砦要害增嚴守備十一月丁未章惇  
上神宗實錄

四年春正月庚寅以阿爾魯子轄蒸襲河西軍節度使  
邈川首領甲午涇原路鈐轄王文振敗夏人於沒煙峽  
庚戌李清臣罷二月己未追貶呂公著為建武軍節度

副使司馬光為清遠軍節度副使王巖叟為雷州別駕  
奪趙瞻傳堯俞贈謚追韓維到任及孫固范百禄胡宗  
愈遺表恩丙寅夏人寇綏德城己卯復元豐榷茶法癸  
未追呂大防為舒州團練使劉摯為鼎州團練副使蘇  
轍為化州別駕梁燾為雷州別駕范純仁為安武軍節  
度副使安置於循新雷化永五州劉奉世為光祿少卿  
分司南京熙韓維以下三十人輕重有差甲申降文彥  
博為太子少保閏月壬寅以曾布知樞密院事許將為

中書侍郎蔡卞為尚書左丞吏部尚書黃履為尚書右丞翰林學士林希同知樞密院事甲辰貶蘇軾為瓊州別駕移昌化軍安置范祖禹移賓州安置劉安世移高州安置三月壬戌夏人犯麟州神堂堡庚午夏人大至葭蘆城知石州張構等擊走之甲戌如金明池辛巳西上閣門使折克行破夏人於長波川壬午命官編類司馬光等改廢法度論奏事狀夏四月己亥呂大防卒於虔州庚子知保安軍李沂伐夏破其洪州壬寅環慶鈐轄

張存入鹽州師還夏人追之與戰不利丁丑追賊王珪  
為萬安軍司戶參軍五月丁巳文彥博薨辛酉扈四京  
囚辛未韓縝薨丁丑貶韓維為崇信軍節度副使六月  
癸未朔日有食之戊子宗楚薨乙巳以保寧軍觀察留  
後宗漢為開府儀同三司徙封安康郡王八月乙酉封  
湖州觀察使世開為安定郡王丙戌鄜延將王慤復宥  
州戊戌封宗祐為嗣濮王九月壬子以星變避殿減膳  
求直言乙卯大赦冬十月戊戌宗景薨十二月癸酉貶劉

奉世為隰州團練副使柳州安置丁丑詔放歸田里程頤涪州編管十二月癸未劉摯卒

元符元年春二月丁酉宗祐薨戊午封宗漢為嗣濮王壬戌申王佖瑞王佖並加司空甲戌進封咸寧郡王佖為莘王普寧郡王似簡王祁國公偲為永寧郡王夏四月庚辰世開薨丙戌章惇等進神宗帝紀梁燾卒於化州壬辰林希罷五月戊申朔御大慶殿受天授傳國受命寶已而減囚罪一等徒以下釋之六月戊寅朔改元丙



戊遣官分詣鄜延涇原河東熙河按驗所築城砦甲午  
蔡京等上常平免役敕令秋七月庚午范祖禹移化州  
安置劉安世梅州安置王巖叟朱光庭諸子並勒停不  
叙九月庚戌秦觀除名移雷州編管冬十月己亥夏人  
寇平夏城十一月壬戌朝獻景靈宮癸亥朝饗太廟甲  
子祀昊天上帝於圜立大赦是歲西番首領李額伊巴  
卓至呂承信等內附

二年春正月丁卯出內府金帛脩陝西邊儲二月己卯

詔高麗國王遣士賓貢甲申夏人以國母卒遣使告哀  
且謝罪却其使不納戊子廊延鈐轄劉安敗夏人於神  
堆三月丙辰遼遣使者來為夏人請緩師丁巳秦鳳經  
略司言吳名革率部族內附己巳以革王俱為司空夏  
四月丁亥以旱減四京囚罪一等杖以下釋之癸巳封  
永嘉郡王偲為睦王遣中書舍人郭知章報聘于遼五月  
癸亥曲赦陝西河東路減囚罪一等流以下釋之乙丑  
進章惇官五等曾布三等許將蔡卞黃履皆二等秋七

月乙巳以盛暑決中外繫囚丁未放在京工役庚戌賑  
河北水災甲子知環州种朴獲夏國監軍額卜博羅丙  
寅洮西安撫使王膽復邈川城西番首領欽彪阿成以  
城降八月癸酉章惇等進新修敕令式戊寅減諸路囚  
罪一等流以下釋之乙酉賜熙河路緡錢撫納部族丙  
申保寧軍節度呂惠卿特授檢校司空九月庚子夏人  
來謝罪癸卯命御史點檢三省樞密院並依元豐舊制  
丁未立賢妃劉氏為皇后己未青唐酋隆贊以城降甲

子除右正言鄒浩名勒新州羈管己未越王茂薨冬十月甲寅日有食之既十一月壬辰詔河北黃河退灘地聽民耕墾免租稅三年

三年春正月辛未帝有疾不視朝戊寅大赦天下蠲民租已卯皇帝崩年二十五謚曰欽文睿武昭孝皇帝加謚憲元繼道顯德定功欽文睿武齊聖昭孝皇帝廟號哲宗陵曰永泰陵

哲宗元祐八年紹聖四年元符三年凡十五年

欽定續通志卷三十一

欽定四庫全書

史部

欽定續通志卷三十三

主事臣尹壯圖覆勘

總校官原任侍講臣王燕緒

欽定四庫全書

欽定續通志卷五十三

宋紀八

徽宗

徽宗皇帝諱佖神宗第十一子也母曰欽慈皇后陳氏  
初授鎮寧軍節度使封寧國公哲宗即位封遂寧郡王  
徙平江鎮江軍節度使進封端王尋加司空改昭德彰  
信軍節度元符三年正月己卯哲宗崩皇太后垂簾哭

謂宰臣曰家國不幸大行皇帝無子天下事須早定章  
惇抗聲曰在禮律當立母弟簡王皇太后曰老身無子  
諸王皆神宗庶子申王長而有目疾其次端王當立惇  
曰端王輕佻不可以君天下知樞密院曾布叱之曰惇  
未嘗與臣等商議如皇太后聖諭樞密當尚書左丞蔡卞  
中書門下侍郎許將相繼曰合依聖旨皇太后又曰先  
帝嘗言端王有福壽且仁孝於是惇默然乃召端王入  
即皇帝位於柩前皇太后權同處分軍國事庚辰大赦



及常赦所不原者百官進秩有差遣宋淵告哀於遼辛巳尊先帝后為元符皇后癸未追尊母貴儀陳氏為皇太妃甲申以章惇為山陵使丙戌以申王佖為太傅進封陳王賜贊拜不名戊子以章惇為特進封申國公己丑進封莘王佖為衛王守太保簡王似為蔡王睦王偲為定王並守司徒二月丁未立順國夫人王氏為皇后庚申以吏部尚書韓忠彥為門下侍郎資政殿大學士黃履為尚書右丞丙寅遣吳安憲朱孝孫以遺留物遺

遼國主三月戊辰朔詔宰臣執政侍從官各舉可任臺  
諫者庚午遣韓治曹謨告即位於遼甲申以西蕃王隆  
贊為河西軍節度使尋賜姓名曰趙懷德邈川首領轄  
蒸為懷遠軍節度使己丑以日當食減四京囚罪一等  
流以下釋之辛卯詔求直言癸巳以寧遠軍節度觀察  
留後世雄為崇信軍節度使封安定郡王夏四月丁酉  
朔日有食之己亥令監司分部決獄甲辰以韓忠彥為  
尚書右僕射兼中書侍郎禮部尚書李清臣為門下侍

郎翰林學士蔣之奇同知樞密院事辛亥大赦悉除元符二年已前在官逋負丁巳詔范純仁等復官官觀蘇軾等徙內郡丙子復廢后孟氏為元祐皇后乙酉蔡卞罷己丑追復文彥博王珪司馬光呂公著呂大防劉摯等三十三人官辛卯還司馬光等致仕遺表恩癸巳以河北河東陝西饑詔帥臣計度振恤六月丙申遼遣使來弔祭秋七月丙寅奉皇太后詔罷同聽政癸酉皇太后還政減天下囚罪一等流以下釋之癸未遣陸佃李嗣

徽報謝於遼罷管勾陝西京川路坑冶及江西廣東湖北夔梓成都路管勾措置鹽事官辛卯封子亶為韓國公八月辛丑出內庫金帛糴陝西軍儲壬寅葬哲宗皇帝於永泰陵丙午遣董敦逸賀遼主生辰呂仲甫賀正旦戊午以蔡王似為太保九月丙寅遼遣使來賀即位丁卯減兩京河陽鄭州囚罪一等民緣山陵役者蠲其賦辛未章惇罷丙子以陳王佖為太尉己丑復均給職田冬十月丙申蔡京出知永興軍貶章惇為武昌軍節

度副使丁酉以韓忠彥為尚書左僕射兼門下侍郎壬寅以曾布為尚書右僕射兼中書侍郎己未禁曲學偏見妄意改作以害國事者辛酉罷平準務十一月丁卯減端州囚罪一等徒以下釋之庚午詔改明年元戊寅以觀文殿學士安燾知樞密院事庚辰黃履罷辛卯以禮部尚書范純禮為尚書左丞十二月甲午以皇太后不豫禱於宮觀祠廟嶽瀆戊戌出廩粟減價以濟民辛丑慮囚戊申減諸路囚罪一等流以下釋之戊午遼使

來賀正旦是歲出宮女六十九人

建中靖國元年春正月癸酉范純仁薨甲戌皇太后崩  
遺詔追尊皇太妃陳氏為皇太后二月乙巳出內庫及  
諸路常平錢備河北邊儲丁巳貶章惇為雷州司戶參  
軍三月乙丑遼使來告其主洪基殂子延禧嗣立遣謝  
文瓘上官均等往弔祭黃寶賀即位丁丑以河西軍節  
度使趙懷德知湟州壬午以日當食避殿減膳降天下  
囚罪一等流以下釋之夏四月辛卯朔日食不見五月

庚辰蘇頌薨戊子減兩京河陽鄭州囚罪一等民緣山陵役者蠲其賦六月庚寅以韓國公亶為開府儀同三司封京兆郡王戊申封向宗回為永陽郡王向宗良永嘉郡王甲寅封吳王顥子孝騫為廣陵郡王益王顥子孝參為信都郡王戊午范純禮罷秋七月丙戌安燾罷丁亥以蔣之奇知樞密院事吏部尚書陸佃為尚書右丞端明殿學士章綽同知樞密院事九月己巳詔諸路轉運提舉司及諸州軍講求遺利及冗員浮費當裁損

者詳議以聞丙戌子裡卒冬十月乙未李清臣罷十一月庚申以陸佃為尚書左丞吏部尚書溫益為尚書右丞壬戌以西蕃伊囉幹為西平軍節度使邈川首領戌寅朝獻景靈宮己卯饗太廟庚辰祀天地於圜丘大赦改明年元十二月壬辰賜陳王佖詔書不名己酉降西京囚罪一等徒以下釋之是歲遼人來獻遺留物

崇寧元年春二月丙戌以皇太妃疾慮囚甲午子亶改名烜以蔡確配饗哲宗廟庭戊戌奉議郎趙諗謀反伏



誅庚子封子煥為魏國公三月壬戌以定王偲為太保  
夏五月庚申韓忠彥罷庚午降復太子太保司馬光為  
正議大夫太保文彥博為太子太保餘各以差奪官丙  
子詔元祐諸臣各已削秩自今無所復問亦勿輒言已  
卯陸佃罷庚辰以許將為門下侍郎溫益為中書侍郎  
翰林學士承旨蔡京為尚書左丞吏部尚書趙挺之為  
尚書右丞六月壬辰減西京河陽鄭州囚罪一等民緣  
山陵役者蠲其賦癸丑詔倣唐六典修神宗所定官制

閏月辛酉盧囚壬戌曾布罷壬午追貶李清臣為武安  
軍節度副使秋七月戊子以蔡京為尚書右僕射兼中  
書侍郎己丑焚元祐法庚子章惇罷甲辰以雨水壞民  
廬舍詔開封府振恤壓溺者八月乙卯子烜改名桓煥  
改名楷辛未置安濟坊養民之貧病者仍令諸郡縣並  
置丙子詔司馬光等二十一人子弟毋得官京師己卯  
以趙挺之為尚書左丞翰林學士張商英為尚書右丞  
九月乙未詔中書籍元符三年臣僚章疏姓名為正上

正中正下三等邪上邪中邪下三等丁酉治臣僚議復  
元祐皇后及謀廢元符皇后者罪降韓忠彥曾布官追  
貶李清臣為雷州司戶參軍黃履為祁州團練副使竄  
曾肇以下十七人已亥籍元祐及元符末宰相文彥博  
等侍從蘇軾等餘官秦觀等內臣張士良等武臣王獻  
可等凡百有二十人御書刻石端禮門庚子以元符末  
上書人鍾世美以下四十一人為正等悉加旌擢范柔  
中以下五百餘人為邪等降責有差時世美已卒詔贈

官仍官其子一人壬寅貶曾布為武泰軍節度使甲辰  
詔元符三年建中靖國元年責降臣僚已經牽復者其  
元責告命並繳納尚書省冬十月癸亥蔣之奇罷戊辰  
詔責降宮觀人不得同一州居住甲戌罷元祐皇后之  
號丙子罷劉奉世等二十七人祠祿戊寅以資政殿學  
士蔡卞知樞密院事十一月乙酉邵州言知溪洞徽州  
楊光銜內附戊申以子楷為開府儀同三司封高密郡  
王十二月癸丑論棄湟州罪貶韓忠彥為崇信軍節度

副使曾布為賀州別駕安燾為寧國軍節度副使范純  
禮分司南京丁丑詔諸邪說詖行非先聖賢之書及元  
祐學術政事並勿施用是歲辰沅州徭入寇出宮女七  
十六人

二年春正月乙酉竄任伯雨陳瓘龔夬鄒浩於嶺南馬  
涓等九人分貶諸州知荆南舒亶討辰沅州徭平之壬  
辰溫益卒乙巳以復荆湖疆土曲赦兩路丁未以蔡京  
為尚書左僕射兼門下侍郎二月辛亥安化蠻入寇廣

西經畧使程節敗之壬子遣官相度湖南北徭地取其  
材植入供在京營造丙子置諸路茶場三月乙酉減西  
京囚罪一等詔黨人子弟毋得擅到闕下癸卯賜禮部  
奏名進士及第出身其嘗上書在正等者升甲卯等者  
黜之夏四月丁卯詔毀呂公著司馬光呂大防范純仁  
劉摯范百祿梁燾王巖叟景靈西京繪像己巳以初謁  
景靈宮大赦乙亥詔毀刊行唐鑑并三蘇秦黃等文集  
戊寅以趙挺之為中書侍郎張商英為尚書左丞戶部

尚書吳居厚為尚書右丞兵部尚書安惇同知樞密院  
事奪王珪贈諡追毀程頤出身文字其所著書令監司  
覺察五月癸巳以陳王佖為太師丙戌貶曾布為廉州  
司戶參軍己亥封子楫為楚國公丙午冊元符皇后劉  
氏為太后六月壬子冊王氏為皇后庚申詔元符末上  
書進士類多詆訕令州郡遣入新學自訟能革心自新  
者許將來應舉其不變者當屏之遠方壬戌慮囚是月  
復湟州秋七月辛巳以復湟州進蔡京官三等蔡卞以

下二等甲申降熙河蘭會路囚罪一等流以下釋之庚寅曾肇責授濮州團練副使乙巳詔責降人子弟毋得任在京及府界差遣八月丁未再論棄湟州罪貶韓忠彥為磁州團練副使安燾為祁州團練副使范純禮為靜江軍節度副使削蔣之奇秩三等戊申張商英罷辛酉詔張商英入元祐黨籍九月辛巳詔宗室不得與元祐姦黨子孫為婚姻庚寅封子樞為吳國公詔上書邪等人知縣以上資序並與外祠選人不得改官及為縣



令辛丑令天下監司長吏廳各立元祐姦黨碑冬十一月庚辰以元祐學術政事聚徒傳授者委監司舉察必罰無赦是歲纂府蠻楊晟銅融州楊晟天邵州黃聰內附

三年春正月己卯安化蠻降辛巳詔上書邪等人毋得至京師甲午賜蔡京子攸進士出身甲辰鑄九鼎二月丙午以判定元豐役法不當黜錢適以下九人丁未置漏澤園己酉詔王珪章惇別為一籍如元祐黨壬子以

楚國公楫為開府儀同三司封南陽郡王庚申令天下  
坑冶金銀復畫輸內藏三月辛巳置文繡院甲午躋欽  
成皇后神主於欽慈皇后之上夏四月乙巳以火災降  
四京囚罪一等流以下原之乙卯復鄆州辛酉徙封楫  
為安樂郡王復鄆州己巳曲赦陝西壬申楫薨五月己  
卯以復鄆廓進蔡京為守司空封嘉國公庚辰許將趙  
挺之吳居厚安惇蔡卞各轉三官六月壬寅圖熙寧元  
豐功臣於顯謨閣癸卯以王安石配饗孔子廟

宋史作  
癸酉日

然下有丙午壬子等  
日則合是癸卯也

戊午詔重定元祐元符黨人及上

書邪等者合為一籍通三百九人刻石朝堂餘並出籍  
癸亥慮囚秋七月庚辰詔自今大禮不受尊號羣臣毋  
上表辛卯行方田法八月甲辰蔡京上神宗史丙午許  
將罷九月乙亥以趙挺之為門下侍郎吳居厚為中書  
侍郎翰林學士承旨張康國為尚書左丞刑部尚書鄧  
洵武為尚書右丞冬十月戊午夏人入涇原圍平夏城  
寇鎮戎軍庚申熙河蘭會路經畧安撫使王厚言河西

軍節度使趙懷德等來降己巳立九廟復翼祖宣祖十  
一月丙戌封子杞為冀國公甲午朝獻景靈宮乙未饗  
太廟丙申祀昊天上帝於圜丘大赦十二月戊午賜陳王  
佖入朝不趨是歲出宮女六十二人廣西黎洞楊晟免  
等內附

四年春正月丙申蔡卞罷丁酉秦鳳蕃落獻邦潘疊三  
州以內侍童貫為熙河蘭湟秦鳳路經畧安撫制置使  
二月甲寅以張康國知樞密院事兵部尚書劉逵同知

樞密院事吏部尚書何執中為尚書左丞乙卯班方田  
法庚申詔西邊用兵招納羌人與斬級同賞閏月己丑  
御端門受趙懷德降授感德軍節度使封安化郡王壬  
辰曲赦熙河蘭湟路三月甲辰以趙挺之為尚書右僕  
射兼中書侍郎庚戌令呂惠卿致仕戊午復銀州丁卯  
牂牁夜郎首領以地降是月夏人攻塞門砦夏四月辛  
未遼使來為夏人求還侵地及退兵戊寅夏人攻臨宗  
砦辛巳詔諸路走馬承受毋得預軍政及邊事己丑夏

人寇順寧砦鄜延第二副將劉延慶擊破之復攻湟州  
北蕃市城知州辛叔獻等擊却之五月戊申除黨人父  
兄子弟之禁壬子遣林攄報聘於遼辛酉命官分部決  
獄六月丙子復解池鹽丁丑慮囚辛巳罷陝西河東力  
役甲申曲赦熙河陝西河東京西路戊子趙挺之罷秋  
七月置四輔郡以潁昌府為南輔襄邑縣為東輔鄭州  
為西輔澶州為北輔甲寅詔奪元祐輔臣墳寺丁巳還  
上書流人八月甲申莫九鼎於九成宮乙酉詣宮酌獻

辛卯賜新樂名大晟置府建官壬辰遣劉正夫使於遼  
九月己亥大赦乙巳詔元祐人貶謫者以次徙近地惟  
不得至畿輔冬十一月戊戌安定郡王世雍薨己未章  
惇卒

五年春正月甲辰以吳居厚為門下侍郎劉逵為中書  
侍郎乙巳以星變避殿損膳求直言闕失毀元祐黨人  
碑復謫者仕籍言者勿復彈糾丁未大赦天下除黨人  
一切之禁權罷方田戊申詔侍從官奏封事已酉罷諸

州歲貢供奉物庚戌詔崇寧以來左降者各以存歿稍復其官盡還諸徙者二月甲子詔監司條奏民間疾苦丙寅蔡京罷為開府儀同三司中太一宮使以觀文殿大學士趙挺之為特進尚書右僕射兼中書侍郎三月丙申詔星變已消罷求直言辛丑封眉州防禦使世福為安定郡王丙辰蔡王似薨夏四月丁丑免兩浙水災州郡夏租五月丁未班紀元厯辛亥封子柎為魯國公六月壬申慮囚秋七月庚寅朔日當食不虧壬寅詔改



明年元冬十月庚辰降開封府囚罪一等徒以下釋之  
十一月辛卯陳王佖薨十二月戊午朔日當食不虧羣  
臣稱賀己未劉達罷是歲廣西黎洞韋晏閑等內附

大觀元年春正月戊子朔大赦甲午以蔡京為尚書左  
僕射兼門下侍郎庚子甘露降於帝鼎內羣臣稱賀壬  
寅吳居厚罷戊申進封衛王佖為魏王定王佖為鄧王  
壬子以何執中為中書侍郎鄧洵武為尚書左丞戶部  
尚書梁子美為尚書右丞乙卯封仲損為南康郡王仲

御為汝南郡王二月壬戌以向宗回為開府儀同三司  
徙封安康郡王甲子以黎洞納土曲赦廣西已卯復行  
方田三月丁酉趙挺之罷以何執中為門下侍郎鄧洵  
武為中書侍郎梁子美為尚書左丞吏部尚書朱諤為  
右丞癸丑趙挺之卒夏五月己丑封子棧為揚國公朝  
散郎吳儲承議郎吳侔坐與妖人張懷素謀反伏誅貶  
呂惠卿為祁州團練副使庚寅鄧洵武罷甲午詔班新  
樂於天下安化蠻犯邊遣兵赴廣西討之乙巳子構生

六月己未以梁子美為中書侍郎乙亥朱諤卒丁丑慮  
囚秋七月戊子詔括天下漏丁八月乙卯曾布卒丁巳  
封子構為蜀國公庚申以戶部尚書徐處仁為尚書右  
丞吏部尚書林攄同知樞密院事己巳降淮海吳楚二  
十六州囚罪一等流以下釋之九月己酉朝獻景靈宮  
庚戌饗太廟辛亥饗明堂大赦冬十月乙丑貶張商英  
為安化軍節度副使閏月丙戌以林攄為尚書左丞資  
政殿學士鄭居中同知樞密院事乙未詔守令以戶口

為殿最十一月壬子朔日有食之蔡京等以不及所當食分率羣臣稱賀戊寅南丹州刺史莫公佖降徐處仁以母憂去位十二月庚寅以蔡京為太尉進何執中以下官二等是歲涪州夷駱世葉駱文貴內附

二年春正月壬子朔受八寶於大慶殿大赦百官進位一等蔡京表賀符瑞已未蔡京進太師加童貫節度使仍宣撫庚申進封魏王偁為燕王鄧王偁為越王並為太尉京兆郡王桓為定王高密郡王楷為嘉王並為司

空吳國公樞為建安郡王冀國公杞為文安郡王楚國  
公栩為安康郡王揚國公棧為濟陽郡王蜀國公構為  
廣平郡王並為開府儀同三司庚午徙封仲損為齊安  
郡王仲御為華陽郡王孝騫為晉康郡王孝參為豫章  
郡王並開府儀同三司封仲增為信安郡王仲忽為普  
安郡王仲癸為咸安郡王仲僕為同安郡王仲縻為淮  
安郡王戊寅徙封向宗回為漢東郡王向宗良為開府  
儀同三司仲損薨河東北盜起二月己亥以安德軍節

度使錢景臻為開府儀同三司三月庚申班金錄靈寶  
道場儀範於天下甲子封子材為魏國公乙亥封子模  
為鎮國公夏四月甲辰復洮州五月庚戌朔日有食之  
辛亥慮囚以復洮州功賜蔡京玉帶加童貫檢校司空  
仍宣撫甲寅復諸路歲貢供奉物壬戌齊格王子臧征  
蒲格降復積石軍戊辰詔官蔡京子孫一人進執政官  
一  
一等秋八月丙申中書侍郎梁子美罷知鄆州九月辛  
亥以林攄為中書侍郎吏部尚書余深為尚書左丞壬

成敗向宗回為太子少保致仕壬申封子植為吳國公  
癸酉皇后王氏崩削向宗回官爵丙子曲赦熙河蘭湟  
秦鳳永興路軍是歲出宮女七十有七人浥夷任應舉  
楊文貴湖南搖楊再光內附

三年春正月己未減兩京河陽鄭州囚罪一等民緣園  
陵役者蠲其賦二月丙子播州楊文貴納土以其地置  
遵義軍丁丑韓忠彥致仕三月丙午立海商越界法壬  
申張康國卒夏四月戊寅林攄罷癸巳以鄭居中知樞

密院事吏部尚書管師仁同知樞密院事癸卯以余深  
為中書侍郎兵部尚書薛昂為尚書左丞工部尚書劉  
正夫為尚書右丞五月丙辰令辟雍宴用雅樂丁巳慮  
囚六月甲戌詔修樂書管師仁罷丁丑蔡京罷辛巳以  
何執中為特進尚書左僕射兼門下侍郎秋七月丁未  
詔謫籍人除元祐姦黨及得罪宗廟外餘並錄用八月  
乙酉封子朴為雍國公己丑嗣濮王宗漢薨甲午以仲  
增為開府儀同三司封嗣濮王己亥韓忠彥薨九月癸



丑封子棣為徐國公冬十一月己巳蔡京進封楚國公致仕仍提舉哲宗實錄朝朔望是歲江淮荆浙福建旱秦鳳階成饑發粟賑之仍蠲其租瀘州夷王募弱內附

四年春正月辛酉詔士庶拜僧者論以大不恭二月庚午朔禁然頂煉臂刺血斷指己丑以余深為門下侍郎資政殿學士張商英為中書侍郎戶部尚書侯蒙同知樞密院事三月甲寅敕所在振恤流民癸亥詔罪廢人

稍加甄叙戊辰詔上書邪下等人今後改官升任並免  
檢舉夏四月己卯班樂尺於天下五月壬寅停僧牒三  
年丙辰以彗見避殿減膳令侍從官直言闕失戊午大  
赦甲子貶蔡京為太子少保丙寅余深罷六月乙亥以  
張商英為尚書右僕射兼中書侍郎壬辰復向宗回為  
開府儀同三司漢東郡王乞未慮囚丙申薛昂罷秋七  
月辛丑復罷方田戊申封子樛為冀國公八月乙亥以  
劉正夫為中書侍郎侯蒙為尚書左丞翰林學士承旨

鄧洵仁為尚書右丞庚辰以資政殿學士吳居厚為門  
下侍郎辛酉詔戒朋黨以張闥知杭州兼領花石綱九  
月丙寅朔日有食之冬十月丁酉立貴妃鄭氏為皇后  
鄭居中罷戊戌以吳居厚知樞密院事十一月乙丑朔朝獻  
景靈宮丙寅饗太廟丁卯祀昊天上帝於圜丘大赦改  
明年元是歲出宮女四百八十六人南丹州首領莫公  
晟內附

政和元年春正月壬申毀京師淫祠一千三十八區戊

寅封子拱為定國公三月癸酉以吏部尚書王襄同知樞密院事夏四月丙辰慮囚立守令勸農黜陟法丁巳以淮南旱降囚罪一等徒以下釋之五月癸亥詔四川羨餘錢物歸左藏庫六月甲寅復蔡京為太子少師秋七月壬申以疾愈大赦八月乙未復蔡京為太子太師丁巳張商英罷九月戊寅王襄罷丁亥封子栻為黃國公是月鄭允中童貫使於遼以李良嗣來良嗣獻取燕之策詔賜姓趙冬十月庚戌封昭化軍節度使宗粹為

信安郡王辛亥貶張商英為崇信軍節度副使十一月  
丙子封子椿為福國公是歲出宮女八十人

二年春二月戊子蔡京復太師致仕賜第京師三月戊  
午定國公拱薨夏四月辛卯復行方田甲午宴蔡京等  
於太清樓乙巳以定國軍節度使仲忽為開府儀同三  
司庚戌以何執中為司空壬子賜張商英自便五月癸  
亥慮囚丁卯封子椿為慶國公己巳蔡京落致仕三日  
一至都堂議事六月己丑以資政殿學士余深為門下

侍郎秋七月壬申訪天下遺書丙子置禮制局九月改  
官制冬十月乙巳得玉圭於民間十一月戊寅受元圭  
於大慶殿大赦辛巳蔡京進封魯國公以何執中為少  
傅太宰兼門下侍郎執政皆進秩十二月甲申行給地  
收馬法乙酉以鄭居中為特進丙戌以武信軍節度使  
童貫為太尉辛亥封子樞為衛國公是歲出宮女三百  
八十三人成都路夷人董舜洛董彥博內附

三年春正月己未以定王桓嘉王楷並為太保庚申以

廣平郡王構為檢校太保甲子詔以天賜元圭遣官冊  
告永裕永泰陵丙寅以燕王保為太傅癸酉追封王安  
石為舒王子雱為臨川伯配饗文宣王廟丁丑吳居厚  
罷以觀文殿學士鄭居中知樞密院事己卯以越王偲  
為太傅封子榑為韓國公二月辛卯崇恩太后暴崩甲  
午以遼及女真相持詔河北警邊防三月壬子朔日有  
食之夏四月庚寅以復溱播等州降德音於梓夔路癸  
巳鄧洵仁罷己酉以資政殿學士薛昂為尚書右丞庚

戊班五禮新儀閏月庚午慶國公椿薨五月乙酉慮囚  
壬寅以復濤播州進執政官一等六月戊辰降兩京河  
陽鄭州囚罪一等民緣園陵役者蠲其賦秋七月甲申  
還王珪孫固贈諡追復韓忠彥曾布安燾李清臣黃履  
等官職八月甲戌以燕樂成進執政官一等丙子以何  
執中為少師冬十月乙丑閱新樂器於崇政殿出古器  
以示百官戊辰詔冬祀大禮及朝景靈宮並以道士百  
人執威儀前導冬十一月辛巳朝獻景靈宮壬午饗太



廟癸未祀昊天上帝於圜丘大赦乙酉以天神降詔告  
在位作天真降臨示現記十二月癸丑詔天下訪求道  
教仙經是歲出宮女二百七十有九人

四年春正月戊寅朔置道階凡二十六等夏四月癸丑  
閱太學辟雍諸生雅樂五月丙戌始祭地於方澤以太  
祖配降德音於天下子機薨六月戊午慮囚秋七月戊  
寅焚苑東門所儲毒藥仍禁勿復貢九月己卯以安靜  
軍節度使王憲為開府儀同三司冬十一月丁丑封子

樸為相國公十二月己酉以禁中神御殿成減天下囚罪一等是歲出宮女六十八人

五年春正月庚辰瀘南晏州夷反梓州路轉運使趙通等討平之二月乙巳立定王桓為皇太子甲寅大赦庚午以童貫領六路邊事三月甲申追論至和嘉祐定策功封韓琦為魏郡王復文彥博官夏四月甲辰作葆真宮五月壬辰慮囚六月癸丑以修三山河橋降德音於河北京東京西路秋七月戊辰朔日有食之甲申以昭

慶軍節度使蔡卞為開府儀同三司丁亥封子機為瀛  
國公八月嗣濮王仲增薨九月己卯封仲御為嗣濮王  
丙戌封子機為惠國公冬十月癸卯以嵩山道人王仔  
昔為沖隱處士是歲出宮女五十人完顏阿古達即皇

帝位更名旻國號大金

據金史  
增輯

六年春正月戊子以瀘南獻捷轉宰執一官以童貫宣  
撫陝西河北閏月丁未置道學二月丁亥詔增廣天下  
學舍庚寅詔廣京城夏四月乙丑會道士於上清寶錄

宮辛未以何執中為太傅致仕朝朔望丙戌卻監司守  
臣進獻庚寅詔蔡京三日一朝正公相位總治三省事  
五月庚子以鄭居中為少保太宰兼門下侍郎劉正夫  
為特進少宰兼中書侍郎壬寅以保大軍節度使鄧洵  
武知樞密院事六月丙寅班中書官制格庚午慮囚秋  
七月辛亥以河陽三城節度使王薦為開府儀同三司  
壬子曲赦湖北八月壬戌戒北邊帥臣毋生事壬午詔  
天下監司郡守搜訪巖谷之士雖忤詭譎怪自晦者悉

以名聞九月辛卯詣玉清和陽宮上太上開天執符御  
歷含真體道昊天玉皇上帝徽號寶冊丙申大赦令洞  
天福地修建宮觀塑造聖像以西內成曲赦京西己未  
以童貫為開府儀同三司冬十月丁酉朝獻景靈宮戊  
戌饗太廟己亥祀昊天上帝於圜丘大赦庚子以禮部  
尚書白時中為尚書右丞辛丑魏公材薨戊申以侯蒙  
為中書侍郎薛昂為尚書左丞己未徙封衛國公握為  
鄆國公十二月戊寅以熙河進築功成進執政一官乙

酉奠九鼎於園像徽調閣劉正夫為開府儀同三司致仕戊子以宗粹為開府儀同三司是歲出宮女六百入茂州夷王永壽內附

七年春正月庚子以殿前都指揮使高俅為太尉召道

士林靈素於溫州築通真宮以處之

據東都事畧增輯

甲子會

道士二千餘人於上清寶籙宮詔通真先生林靈素諭以帝君降臨事辛未改天寧萬壽觀為神霄玉清萬壽宮乙亥如上清寶籙宮命林靈素講道經三月庚寅賜

高麗祭器乙未以童貫權領樞密院夏四月庚申帝諷  
道錄院上章冊已為教主道君皇帝五月己丑如玉清  
和陽宮上承天效法厚德光大后土皇地祇徽號寶冊  
辛丑祭地於方澤降德音於諸路癸卯改玉清和陽宮  
為玉清神霄宮六月戊午朔以明堂成進封蔡京為陳  
魯國公戊辰以嘉王楷為太傅己巳蔡京辭兩國不拜  
詔官其親屬二人秋七月庚子詔八寶增定命寶八月  
鄭居中以母憂去位九月辛卯大饗明堂大赦乙未劉

正夫卒丁酉西蕃王子伊瑪黨蒸來降壬寅進宰執官  
一等甲辰以薛昂為特進冬十月乙卯朔初御明堂班  
朔布政戊寅侯蒙罷十一月庚寅命蔡京五日一赴都  
堂治事辛卯鄭居中起復以余深為特進少宰兼中書  
侍郎白時中為中書侍郎丙申何執中卒十二月丁巳  
以薛昂為門下侍郎戊辰天神降於坤寧殿庚午以童  
貫領樞密院命戶部侍郎孟揆作萬歲山是歲出宮女  
六十八人



重和元年春正月甲申朔受定命寶於大慶殿戊子封  
孫諶為崇國公己丑大赦應元符末上書邪中等人依  
無過人例乙巳封姪有奕為和義郡王庚戌以翰林學  
士承旨王黼為尚書左丞三月戊辰增諸路酒價庚子  
遣武義大夫馬政由海道使於女真約夾攻遼三月癸  
巳令嘉王楷赴廷對丙申以茂州蕃族平曲赦四川夏  
五月壬午朔日有食之乙酉詔諸路選漕臣一員提舉  
本路神霄宮丁亥以林靈素為通真達靈元妙先生張

虛白為通元冲妙先生壬辰班御製聖濟經以青華帝  
君八月九日生辰為元成節庚戌敕兩浙漕司以權添  
酒錢盡給御前工作六月己巳以淮西盜平曲赦庚子  
慮囚甲戌以西邊獻捷曲赦陝西河東路秋七月壬午  
以西師有功加蔡京恩官其一子鄭居中為少傅余深  
為少保鄧洵武為特進進執政官一等己酉遣使振東  
南諸路水災八月甲寅以童貫為太保辛酉詔班御註  
道德經癸酉封子椅為嘉國公九月辛巳大饗明堂壬

午詔罷拘白地禁權貨增方田稅添酒價取醋息河北  
加折耗米東南水災強糴等事己丑以歲當戌月當壬  
為元命降德音於天下庚寅薛昂罷以白時中為門下  
侍郎王黼為中書侍郎翰林學士承旨馮熙載為尚書  
左丞刑部尚書范致虛為尚書右丞壬辰禁州郡遏糴  
及邊將殺降以倖功賞者癸巳禁羣臣朋黨辛丑鄭居  
中罷詔視中大夫林靈素視中奉大夫張虛白並特授  
本品真官閏月庚申詔江淮荆浙閩廣監司督責州縣

還集流民丁卯進封楷為鄆王丙子詔周柴氏後已封  
崇義公復立恭帝後以為宣義郎世世為國三恪冬十  
月甲辰置道官二十六等道職八等十一月己酉朔改  
元大赦

欽定續通志卷三十二

欽定四庫全書

欽定續通志卷三十三

宋紀九

徽宗二

欽宗

宣和元年春正月壬子封進建安郡王樞為肅王文安郡  
王祀為景王並為太保乙卯詔佛改號大覺金僊餘為  
僊人大士僧為德士寺為宮院為觀改女冠為女道尼  
為女德丁巳金遣使來聘

謹按通鑑輯覽

御批是時宋政雖衰國體未損書法於來聘諸例自當仍從  
續綱目原文至靖康以後稱姪稱臣幾與石晉事邈無異  
既自失其一統之尊豈可復拘內外之說則宋在所  
應貶改書正所以深戒建中立極者慎毋失其統也 遣趙

有開報之至登州而還戊午以余深為太宰兼門下  
侍郎王黼為特進少宰兼中書侍郎癸酉封子棟為  
溫國公姪有恭為永寧郡王二月庚辰改元戊戌以  
鄧洵武為少保三月庚戌蔡京等進安州所得商六  
鼎己未以馮熙載為中書侍郎范致虛為尚書左丞  
翰林學士張邦昌為尚書右丞詔天下知宮觀道士與

監司郡縣官以客禮相見童貫遣知熙州劉法攻統安  
城夏人擊之法敗歿夏人進圍震武軍甲子知登州宗  
澤坐建神霄宮不虔除名編管夏四月丙子朔日有食  
之庚寅童貫以鄜延環慶兵大破夏人平其三城己亥  
曲赦陝西河東路辛丑進輔臣官一等五月丙辰童貫  
敗夏人於震武壬申班御製九星二十八宿朝元冠服  
圖甲戌慮囚六月壬午詔西邊武臣為經畧使者改用  
文臣甲申詔封莊周為微妙元通真君列禦寇為致虛

觀妙真君仍行冊命配享混元皇帝己亥夏國遣使納款詔六路罷兵秋七月甲寅以童貫為太傅封涇國公八月戊寅詔諸路未方田處並令方量均定租課丁酉以神霄宮成降德音於天下范致虛以母憂去位九月甲辰燕蔡京於保和新殿辛酉大饗明堂丁卯以淮康軍節度使蔡攸為開府儀同三司冬十月甲戌以紹述熙豐政事書布告天下十一月癸丑朝獻景靈宮甲寅饗太廟乙卯祀昊天上帝於圜丘大赦甲子以東南諸路



水災令監司郡守悉心振救戊辰以張邦昌為尚書左  
丞翰林學士王安中為尚書右丞十二月甲戌詔京東  
東路盜賊竊發令東西路提刑督捕之丙申編管正字曹輔  
于郴州

二年春正月癸亥追封蔡確為汝南郡王甲子罷道學  
二月乙亥遣趙良嗣使於金約攻遼唐恪罷庚辰以寧  
遠軍節度使梁子美為開府儀同三司戊子令所在贍  
給淮南流民諭還之夏六月癸酉詔開封府賑濟饑民

戊寅蔡京致仕仍朝朔望辛巳詔自今議改元豐法制者以大不恭論丁亥復寺院額秋七月壬子罷文臣起復丙寅封子穗為英國公九月壬寅金遣使者來乙巳復德士為僧辛亥大饗明堂丙辰遣馬政使於金癸亥余深加少傅冬十月戊辰朔日有食之以河東節度使梁師成為太尉建德軍清溪妖賊方臘反命譚稹討之十一月己亥余深罷仍以少傅授鎮西軍節度使知福州庚戌以王黼為少保太宰兼門下侍郎己未兩浙都

監蔡遵顏坦擊方臘死之十二月丁亥改譚鎮為兩浙  
制置使以童貫為江淮荆浙宣撫使討方臘己丑  
以少傅鄭居中權領樞密院是月方臘陷建德又陷歙  
州東南將郭師中死之又陷杭州肅訪使者趙約死之

三年春正月壬寅鄧洵武卒戊午以安康郡王栩為太  
保進封濟王鎮國公模為開府儀同三司進封樂安郡  
王辛酉罷蘓杭州應奉局及花石綱運乙丑罷西北兵  
庚戌罷木石彩色等場務是月方臘陷婺州又陷衢州

守臣彭汝方死之二月庚午罷方田甲戌降詔撫方臘  
癸巳大赦是月方臘陷處州淮南盜宗江等犯淮陽軍  
又犯京東江北命知州張叔夜招降之夏四月甲戌清  
溪令陳光以賊發棄城伏誅庚寅忠州防禦使辛興宗  
擒方臘于清溪詔兩浙江東被賊州縣給復三年五月  
戊戌以鄭居中領樞密院丙午金人再遣使來戊申以  
興寧軍節度使劉宗元為開府儀同三司癸亥安置御  
史中丞陳過庭于黃州閏月甲戌復應奉司命王黼及

內侍梁師成領之戊寅慮囚秋七月丁卯振溫處等八  
州戊子童貫等俘方臘以獻八月甲辰曲赦兩浙江東  
福建淮南路乙巳以童貫為太師譚稹加節度使九月  
丙寅以王黼為少傅鄭居中為少師庚午進執政官一  
等辛未大饗明堂冬十月甲寅詔自今賦吏獄具論決  
勿貸童貫復領陝西兩河宣撫十一月丁丑馮熙載罷  
以張邦昌為中書侍郎王安中為尚書左丞翰林學士  
承旨李邦彥為尚書右丞辛巳封子桐為儀國公壬午

張商英卒十二月壬子進封廣平郡王構為康王樂安郡王模為祁王並為太保

四年春正月丁卯以蔡攸為少保梁師成為開府儀同三司癸酉金破遼中京遼主北走二月丙午以吳國公植為開府儀同三司進封信都郡王三月丙子遼人立燕王淳為帝金遣使者來命童貫為河北河東路宣撫使屯兵于邊以應之且招諭幽燕夏五月壬戌以高俅為開府儀同三司丁卯封子柄為昌國公甲戌嗣濮王

仲御薨乙亥以蔡攸為河北河東宣撫副使庚辰以常  
德軍節度使譚稹為太尉童貫至雄州癸未遼人擊敗  
前軍統制楊可世于蘭溝旬乙酉封開府儀同三司江  
夏郡王仲爰為嗣濮王丙戌慮囚楊可世與遼戰于白  
溝敗績丁亥辛興宗敗于范村六月己丑种師道退保  
雄州遼人追擊之至城下帝聞兵敗懼詔班師壬寅以  
王黼為少師是月遼燕王淳死蕭幹等立其妻蕭氏秋  
七月壬午王黼以耶律淳死復命童貫蔡攸治兵以河

陽三城節度使劉延慶為都統制甲申貶种師道為右  
衛將軍致仕九月戊午朝散郎宋昭上書諫北伐除名  
勒廣南編管己未金使來議師期甲戌遣趙良嗣報聘  
于金己卯遼將郭藥師等以涿易二州來降冬十月庚  
寅改燕京為燕山府涿易八州並賜名癸己劉延慶與  
郭藥師等統兵出雄州戊戌曲赦所復州縣己亥耶律  
淳妻蕭氏上表稱臣納款甲辰師次涿州己酉郭藥師  
與高世宣楊可世等襲燕遼蕭幹援之藥師等屢敗癸



丑以蔡攸為少傅判燕山府甲寅劉延慶自盧溝河燒營  
遁衆軍大潰十一月丙辰朔行新墾戊辰朝獻景靈宮  
己巳饗太廟庚午祀昊天上帝于園兵大赦東南官吏  
緣寇盜貶責者次第移放上書邪上等人特與磨勘戊  
寅金人遣使來許歸山前六州以彰德軍節度使鄭詳  
為太尉十二月丁亥郭藥師敗蕭幹于永清縣戊子遣  
趙良嗣報聘于金庚寅以郭藥師為武泰軍節度使辛  
卯金人入燕蕭氏出奔壬辰使來告捷丙申貶劉延慶

為率府率安置筠州壬寅進封植為莘王是月萬歲山  
成更名曰良嶽

五年春正月戊午金使來議所許六州代租錢己未遣  
趙良嗣報聘求西京等州辛酉以王安中為慶遠軍節  
度使河北河東燕山府路宣撫使知燕山府甲申錄富  
弼後二月乙酉以李邦彥為尚書左丞翰林學士趙野  
為尚書右丞丁酉進封雍國公朴為華原郡王徐國公  
棣為高平郡王並開府儀同三司三月乙卯金再遣使

者來己未遣盧益報聘夏四月癸巳金人遣使以誓書  
及燕京涿易檀順景薊州來歸庚子童貫蔡攸入燕乙巳  
童貫奏撫定燕城庚戌曲赦河北河東燕雲路是日班  
師五月己未以收復燕雲賜王黼玉帶庚申以王黼為  
太傅鄭居中為太保進宰執官二等辛酉以王黼總治  
三省事癸亥童貫落節鉞進封徐豫國公以蔡攸為少  
師癸酉祭地於方澤是月金人許歸朔武蔚三州金主  
旻殂弟烏奇邁立六月乙酉郭藥師加檢校少傅丙戌

遼將張覺以平州來附己丑仲爰薨丁酉以安國軍節  
度使仲理為開府儀同三司進封嗣濮王己亥慮囚戊  
申鄭居中卒辛亥以蔡攸領樞密院秋七月戊午以梁  
師成為少保己未童貫致仕起復譚稹為河北河東燕  
山府路宣撫使庚午太傅楚國公王黼等上尊號曰繼  
天興道敷文成武睿明皇帝不允禁元祐學術八月辛  
巳朔日當食不見辛丑命王安中作復燕雲碑是月蕭  
幹破景州薊州寇燕山郭藥師敗之幹尋為其下所殺

傳首京師九月辛酉大饗明堂冬十一月乙卯以鄭紳  
為太師丁卯王安中譚稹並加檢校少傅郭藥師為太  
尉華原郡王朴薨是月金人取平州張覺走燕山王安  
中殺之函其首送於金十二月乙巳金人遣使告哀復  
遣使來賀正旦戊申以高平郡王棣為太保進封徐王  
是歲秦鳳旱河北京東淮南饑遣官賑濟

六年春正月乙卯為金主輟朝戊寅遣連南夫如金弔  
祭二月丁亥以冀國公栲為開府儀同三司進封河間

郡王韶州防禦使令盪為婺州觀察使封安定郡王李  
邦彥以父憂去位三月己酉以錢景臻為少師金人來  
索趙良嗣所許糧不與夏四月丁巳李邦彥起復五月  
壬寅慮囚癸卯金人遣使來告嗣位六月壬子詔以收  
復燕雲京東兩河之民困於調度令京西淮浙江湖四  
川閩廣並納免夫錢秋七月戊子遣許亢宗使于金賀  
嗣位八月乙卯譚稹罷復以童貫領樞密院事壬戌以  
復燕雲大赦九月乙亥以白時中為特進太宰兼門下

侍郎李邦彥為少宰兼中書侍郎丁亥以趙野為尚書  
左丞翰林學士承旨字文粹中為尚書右丞開封尹蔡  
懋同知樞密院庚寅以金芝產于艮嶽萬壽峰改名壽  
岳庚子金人遣使致其先主遺留物冬十月庚午詔有  
收藏蘇軾黃庭堅之文者並焚毀犯者以大不恭論十  
一月丙子王黼致仕乙酉罷應奉司十二月甲辰以蔡  
京領講議司詔百官遵行元豐法制癸亥蔡京落致仕  
領三省事是歲河北山東盜起命內侍梁方平討之

七年春正月癸酉朔詔赦兩河京西流民為盜者仍給復  
一年二月金滅遼三月庚戌詔京師運米五十萬斛振  
燕山令工部侍郎孟揆親往措置己巳進封廣國公棧  
為南康郡王福國公榛為平陽郡王並開府儀同三司  
壬申京東轉運副使李昌言招安羣盜張萬仙等三月  
甲申知海州錢伯言奏招降山東寇賈進等丙戌以惠  
國公棧為開府儀同三司進封建安郡王夏四月丙辰  
降德音于京東河北路庚申蔡京復致仕復州縣免行



錢戊辰詔行元豐官制五月壬午封子樞為潤國公六月丙午封童貫為廣陽郡王戊申詔臣僚輒與內侍來往者論罪辛亥慮囚已未以蔡攸為太保乙丑罷減六尚歲貢物秋七月庚午詔士庶毋以天王君聖為名字及以壬戌日輔臣焚香甲戌以河間郡王楷為太保進封沂王是月河東義勝軍叛九月壬辰金人以擒遼主遣使來告是月河東言金將納罕至雲中詔童貫復往宣撫冬十月戊午罷京畿和羅十一月乙亥遣使如金賀

得遼主甲申獻景靈宮乙酉饗太廟丙戌祀昊天上帝于圜丘大赦庚寅以保靜軍節度使种師道為河東河北路制置使十二月乙巳童貫自太原遁歸京師己酉金將沃哩布納罕分兩道來侵郭藥師以燕山叛金人克北邊諸郡又陷忻代等州圍太原府太常少卿傅察奉使不屈死之丙辰罷浙江諸路花石綱延福宮西城租課及內外製造局金兵攻中山府戊午以皇太子桓為開封牧己未下詔罪己令中外直言極諫郡邑率師勤

王莽草澤異才有能出奇計及使疆外者罷道官及大  
晟府行幸局暨諸局務以保和殿大學士宇文虛中為  
河北東路宣諭使庚申以吳敏為門下侍郎詔禪位于  
皇太子皇太子即皇帝位尊帝為教主道君太上皇帝  
皇后為太上皇后退居龍德宮靖康元年正月己巳如  
亳州遂如鎮江府四月己亥還京師明年二月丁卯金  
人脅帝北行紹興五年四月甲子崩于五國城年五十  
四江南遙上尊諡曰聖文仁德顯孝皇帝加諡體神合

道駿烈遜功聖文仁德憲慈顯孝皇帝廟號徽宗權損于永祐陵

徽宗建中靖國二年崇寧五年大觀四年政和七年重和一年宣和七年凡二十六年

欽宗皇帝諱桓徽宗長子也母曰恭顯皇后王氏初名亶封韓國公進京兆郡王尋更名烜旋又改今名進封定王政和三年加太保五年二月乙巳立為皇太子宣和七年十二月戊午除開封牧庚申徽宗下詔禪位于

太子趣太子入禁中被以御服泣涕固辭因得疾又固辭不許辛酉即皇帝位以少宰李邦彥為龍德宮使太保領樞密院事蔡攸門下侍郎吳敏副之是時金人已分道入境壬戌大赦進百官秩一等賞諸軍立妃朱氏為皇后以太子詹事耿南仲簽書樞密院事遣給事中李鄴使于金告以內禪且請修好詔非三省樞密院所得旨有司勿行甲子沃哩布陷信德府納罕圍太原詔京東淮西兩浙募兵入衛太學生陳東等上書數蔡京

童貫王黼梁師成李彥朱勔罪謂之六賊請誅之詔改  
明年元

靖康元年春正月丁卯朔帝御垂拱殿受羣臣朝賀退  
詣龍德宮賀道君皇帝詔中外臣庶實封言得失金人  
破相州戊辰破潘州威武軍節度使梁方平師潰河北  
河東路制置副使何灌退保滑州己巳灌師亦潰金人  
濟河破滑州帝下詔親征以侍郎李綱為親征行營使  
吳敏副之以蔡攸為太上皇帝行宮使尚書左丞宇文

粹中副之奉 upper 皇東行以避敵詔自今除授黜陟及恩數等事並參酌祖宗舊制罷內外官司局所一百五處以門下侍郎吳敏知樞密院事吏部尚書李昉同知樞密院事賤太傅致仕王黼為崇信軍節度副使安置永州尋殺之賜安德軍承宣使李彥死並籍其家放寧遠軍節度使朱勔歸田里庚午道君皇帝如亳州宰相欲奉帝出襄鄧李綱諫止之以綱為尚書右丞東京留守辛未以李綱為親征行營使侍衛親軍馬軍都指揮使

曹矜副之太宰兼門下侍郎白時中罷李邦彥為太宰  
兼門下侍郎守中書侍郎張邦昌為少宰兼中書侍郎  
尚書左丞趙野為門下侍郎翰林學士承旨王孝迪為  
中書侍郎同知樞密院事蔡懋為尚書左丞壬申金人  
濟汴遣使督諸道兵入援癸酉詔兩省樞密院官制一  
遵元豐故事金人逼京師命尚書駕部員外郎鄭望之  
康州防禦使高世則使其軍詔從官舉文武臣僚堪充  
將帥有膽勇者是夜金人攻宣澤門李綱禦之至旦始



退甲戌金人遣吳孝民來議和命李稅使如金軍遂與  
金使蕭三寶努律耶忠張愿蔡偕來以吏部尚書唐恪  
同知樞密院事乙亥金人攻通津景陽等門武泰節度  
使何灌拒戰死之丙子避正殿減常膳括借都城金銀  
及倡優家財庚辰以張邦昌為計議使副康王構往金  
軍為質以求成詔稱金國加大字辛巳道君皇帝至鎮  
江以兵部尚書路允迪簽書樞密院事金人陷陽武知  
縣事蔣興祖死之壬午封子諶為大寧郡王甲申都統

制馬忠以京西募兵至擊金人于順天門外敗之乙酉  
路允迪使納罕軍于河東平陽府將劉嗣初以城叛丁  
亥靖難軍節度使河北河東路制置使种師道督涇原  
秦鳳兵入援以師道同知樞密院事為京畿河北河東  
宣撫使統四方勤王兵及前後軍乙未敗少保淮南節  
度使梁師成為彰化軍節度副使旋賜死二月丁酉朔  
都總制姚平仲夜襲金師不克而遁戊戌罷李綱以謝  
金人廢親征行營司金人復來議和庚子命駙馬都尉

曹晟使金軍辛丑又命資政殿大學士宇文虛中知東  
上閤門事王侁副之許割三鎮地太學諸生陳東等及  
都民數萬人伏闕上書請復用李綱及种師道乃復綱  
右丞克京城防禦使壬寅除元祐黨籍學術之禁禁伏  
闕上書廢苑囿宮觀可以與民者金人使王訥來癸卯  
以肅王樞為質于金以觀文殿學士大名尹徐處仁為  
中書侍郎宇文虛中簽書樞密院事蔡懋罷乙巳宇文  
虛中王侁復使金軍康王及張邦昌至自金軍金人遣

韓光裔來告辭遂退師京師解嚴丙午以康王構為太傅靜江奉寧軍節度使戊申大赦詔自今庶事並遵用祖宗舊制凡蠹國害民之事一切寢罷己酉罷宰執兼神霄玉清萬壽宮使詔用祖宗故事擇武臣得軍心者為同知簽書樞密院邊將有威望者為三衙庚戌李邦彥罷以張邦昌為太宰兼門下侍郎吳敏為少宰兼中書侍郎李綱知樞密院事耿南仲為尚書左丞李稅為尚書右丞辛亥宇文粹中罷知江寧府癸丑种師道罷

為中太一宮使甲寅蔡京為祕書監分司南京童貫為  
左衛上將軍池州居住蔡攸為太中大夫提舉亳州明  
道宮納罕攻太原不克分兵趣京師權威勝軍李植以  
城降乙卯陷隆德府知府張確通判趙伯臻司錄張彥  
適死之辛酉梁方平坐棄河津伏誅王孝迪罷以給事  
中王雲侍衛親軍馬軍都指揮使曹暉使於金以鎮洮  
軍節度使中太乙宮使种師道為河南河東路宣諭使  
保靜軍節度使前副都指揮使姚古為制置使丙寅下

哀痛之詔於陝西河東是月金人攻澤州之高平知州高世由往犒之乃去三月丁卯朔遣徽猷閣待制宋煥奉表於道君皇帝行宮詔侍從言事詔非三省樞密院所奉旨諸司不許奉行戊辰李稅罷為鴻慶宮使己巳張邦昌罷為中太一宮使徐處仁為太宰兼門下侍郎唐恪為中書侍郎翰林學士何栗為尚書右丞御史中丞許翰同知樞密院事庚午宇文虛中罷知青州癸酉以趙野為道君皇帝行宮奉迎使己卯以燕王侯越王

惲為太師壬午詔金人叛盟深入其元主和議之李邦  
彥奉使許地之李梈李鄴鄭望之悉行罷黜其太原中  
山河間三鎮保塞陵寢所在誓當固守於是以种師道  
為河北河東宣撫使姚古為河北制置使种師中副之癸  
未遣李綱迎道君皇帝於南京以徐處仁為禮儀使丙  
戌以知中山府詹度知太原府張孝純知河間府陳遘並  
為資政殿學士知澤州高世由直龍圖閣庚寅以肅王  
樞為太傅姚古復隆德府辛卯復威勝軍壬辰以太保

景王杞濟王栩為太傅甲午康王構為集慶建雄軍節  
度使尚書戶部侍郎錢蓋為陝西制置使命陳東初品  
官賜同進士出身辭不拜籍朱勔家丙申敗蔡京為崇  
信軍節度副使是春夏人取天德雲內武州及河東八  
館夏四月戊戌夏人陷鎮威城攝知城事朱昭死之己  
亥奉迎太上皇帝入京師壬寅朝於龍德宮癸卯立子  
諶為皇太子耿南仲為門下侍郎戊申置詳議司於尚  
書省討論祖宗法庚戌趙野罷壬子金人使賈震冉企



弓來癸丑封太師沂國公鄭紳為樂平郡王貶童貫為  
昭化軍節度副使安置郴州減宰職俸三之二及支賜  
之半令吏部稽考庶官凡由楊戩李彥之公田王黼朱  
勔之應奉童貫西北之師孟昌齡河防之役夔蜀湖南  
之開疆關陝河東之改幣及近習所引獻頌特試之流  
所得爵賞悉奪之甲寅种師道加太尉同知樞密院事  
河北河東路宣撫使乙卯詔自今假日特坐百司毋得  
休務以平涼軍節度使范訥為右金吾衛上將軍丙辰

詔有告姦人妄言金人復至以恐動居民者賞之戊午  
進封南康郡王栻為和王平陽郡王榛為信王壬戌詔  
親擢臺諫官宰執勿得薦舉著為令追政和以來道官  
處士先生封贈奏補等敕書甲子東兵正將占沅與金  
人戰於交城縣死之乙丑詔三衙并諸路帥司各舉諳  
練邊事智勇過人并豪俊奇傑衆所推服堪充統制將  
領者各五名貶蔡攸節度副使安置朱勔於循州五月  
丁卯詔天下有能以財穀佐軍者有司以名聞以少傅

鎮西軍節度使余深為特進觀文殿大學士戊辰罷王  
安石配享孔子廟庭庚午少傅安武軍節度使錢景臻  
鎮安軍節度使開府儀同三司劉宗元並為左金吾衛  
上將軍保信軍節度使劉敷武成軍節度使劉敏嚮德  
軍節度使張楙岳陽軍節度使王舜臣應道軍節度使朱孝  
孫瀛川軍節度使錢忱並為右金吾衛上將軍監察御史余應求坐  
言事迎合大臣罷知衛州甲戌曲赦河北路乙亥申銷金禁  
丁丑詔以儉約先天下授監司郡縣奉行所未及者凡

十有六事姚古至威勝師潰河東大振种師中與金人戰於榆次死之已卯借外任官職田一年開府儀同三司高球卒辛巳損太官日進膳追削高球官甲申罷詳議司己丑以河東經畧安撫使張孝純為檢校少保武當軍節度使壬辰詔天下舉習武藝兵書者乙未詔姚古援太原六月丙申朔詔諫官極論闕失戊戌令中外舉文武官才堪將帥者以李綱代种師道為宣撫使往援太原辛丑以資政殿學士劉韜為宣

撫副使陝西制置司都統制解潛為制置副使壬寅封  
鄆國公榘為安康郡王韓國公捷為廣平郡王並開府  
儀同三司癸卯以侍衛親軍馬軍副都指揮使鎮西軍  
承宣使王稟為建武軍節度使甲辰路允迪罷為醴泉  
觀使乙巳左司諫陳公輔以言事責監合州酒務癸丑  
慮囚辛酉承授內侍官熙河都統制焦安節坐不法李  
綱斬之壬戌姚古坐擁兵逗遛貶為節度副使安置廣  
州秋七月乙丑除元符上書邪等之禁乙亥安置蔡京

于儋州攸雷州童貫吉陽軍已卯免借河北河東陝西路職田乙酉詔蔡京子孫已分竄遠地遇赦不許量移是日京死于潭州丁亥令侍從官共議改修宣仁聖烈皇后謗史辛卯遣監察御史張激誅童貫廣西轉運副使李昇之誅趙良嗣並竄其子孫于海南是月解潛與金人戰于南關敗績劉韜自遼州引兵與金人戰敗績八月丙申復命种師道以宣撫使巡邊召李綱還庚子以星變避殿減膳令從臣具民間疾苦以聞河東察訪

使張灝與金人戰於文水敗績辛丑詔求民之疾苦者  
十七事悉除之丁未沃哩布復攻廣信軍保州不克遂  
攻真定戊申都統制張思正等夜襲金人於文水敗之  
己酉復戰師潰思正奔汾州都統制折可求師潰於子  
夏山金人乘勝攻太原復分道進軍乙卯遣徽猷閣待制  
王雲閣門宣贊舍人馬識遠使於金祕書著作佐郎  
劉岑太常博士李若水分使其軍議和戊午許翰罷知  
亳州己未太宰徐處仁罷知東平少宰吳敏罷知揚州

以唐恪為少宰兼中書侍郎何臬為中書侍郎禮部尚書陳過庭為尚書右丞開封尹聶昌同知樞密院事御史中丞李回簽書樞密院事庚申遣王雲使金軍許以三鎮賦稅是月福州軍亂殺其知州事柳庭俊九月丙寅金人克太原執安撫使張孝純副都總管王稟通判方笈等死之辛未貶吳敏為崇信軍節度副使安置涪州移蔡攸於萬安軍尋與弟儵及朱勔皆賜死丁丑以禮部尚書王寅為尚書左丞戊寅李綱罷知揚州壬午



梟童貫首於都市丙戌建三京及鄧州為都總管府分  
總四道兵庚寅以知大名府趙野為北道都總管知河  
南府王襄為西道都總管知鄧州張叔夜為南道都總  
管知應天府胡直孺為東道都總管又罷李綱提舉洞  
霄宮辛卯遣給事中黃鶚由海道使金議和是月夏人  
陷西安州冬十月癸巳敗李綱為保靜軍節度副使安  
置建昌軍丁酉金人破真定都鈐轄劉昫死之戊戌金  
人使楊天吉王訥來庚子金人陷汾州知州張克戩兵

馬都監賈亶死之又攻平定軍辛丑下哀痛詔命河北河東都路帥臣傳檄所部得便宜行事甲辰詔用蔡京王黼童貫所薦人丙午集從官於尚書省議割三鎮召种師道還丁未以禮部尚書馮澥知樞密院事己酉閱砲飛山營庚戌以范訥為寧武軍節度使河北河東路宣撫使遼故將小鞠鞬攻陷麟州建寧砦知砦楊震死之壬子詔太常禮官集議金主尊號命尚書左丞王寓副康王使沃哩布軍寓辭丙辰金人克平陽府又克威

勝隆德澤州戊午貶王寓為單州團練副使以馮澥代  
行庚申侍御胡舜陟請援中山不省辛酉种師道薨十  
一月丙寅夏人陷懷德軍知軍事劉銓通判杜翊世死  
之籍譚稹家戊辰康王未至金軍而還馮澥罷己巳集  
百官議三鎮棄守癸酉右諫議大夫范宗尹以首議棄  
地罷金人至河內宣撫副使折彥質拒之甲戌師潰金  
人濟河知河陽燕瑛西京留守王襄棄城遁乙亥命刑  
部尚書王雲副康王使沃哩布軍許割三鎮奉袞冕車

輅尊其主為皇叔且上尊號丙子金人度河提刑許高  
兵潰于洛口金人來言欲盡得河北地京師戒嚴遣資  
政殿學士馮澥及李若水使納罕軍丁丑何鼎罷以尚  
書左丞陳過庭為尚書侍郎兵部尚書孫傳為尚書右  
丞命成忠郎郭京領選六甲兵命簽書樞密院事李回  
以萬騎防河衆潰而歸是日塞京城門戊寅以康王構  
為安國安武軍節度使壬午沃哩布使楊天吉王訥貝勒  
色勒默來命耿南仲使沃哩布軍聶昌使納罕軍許畫

河為界康王至磁州州人殺王雲王復還相州甲申尚  
書右丞孫傳同知樞密院事御史中丞曹輔簽書樞密  
院事以京兆府路安撫使范致虛為陝西五路宣撫使  
令督勤王兵入援乙酉金軍逼京城丁亥李回罷戊子  
金人攻通津門己丑南道總管張叔夜將兵勤王至玉  
津園以叔夜為延康殿學士沃哩布遣劉晏來庚寅帝  
如東壁勞軍詔三省長官名悉依元豐舊制以領開封  
府何栗為門下侍郎閏月壬辰金人攻善利門唐恪罷

以何栗為尚書左僕射兼中書侍郎劉韜坐棄軍降五  
官予祠癸巳京師大寒用日者言借土牛迎春知澤州  
高世由以城降于金都民殺東壁統制官辛亢宗罷民  
乘城代以保甲甲午帝被甲登城驛召李綱為資政殿  
大學士領開封府金人破懷州知州霍安國通判林淵  
鈐轄張彭年都監趙士訐張譔死之乙未金人入青城  
攻朝陽門馮澥與金人蕭慶楊真誥來丙申帝如宣化  
門以張叔夜為資政殿學士金人執胡直孺又破拱州

丁酉以馮澥為尚書左丞戊戌殿前副都指揮使王宗楚  
與金人戰于城下統制官高師旦死之庚子以張叔夜  
簽書樞密院事金人攻宣化門辛丑金人攻南壁壬寅  
詔河北守臣盡起軍民兵倍道入援癸卯金人攻南壁  
張叔夜范瓊分兵襲之大潰奔還甲辰大雨雪金人破  
亳州遣間使召諸道兵勤王乙巳大寒士卒喋戰不能  
執兵有僵仆者帝徒跣祈晴時勤王兵不至金人攻城  
急丁未避正殿己酉遣馮澥曹輔與宗室仲溫士諱使

金軍請和命康王為天下兵馬大元帥速領兵入衛辛  
亥金人來議和要親王出盟壬子金人攻通津宣化門  
范瓊以千人出戰渡河冰裂兵多沒者甲寅大風俄大  
雨雪連日夜不止乙卯金人復使劉晏來趣親王宰相  
出盟丙辰郭京用六甲法盡令守禦人下城大啓宣化  
門出攻金人大敗京引餘兵遁去金兵登城焚南薰諸  
門姚仲友死于亂兵統制官何慶言陳克禮中書舍人  
高振力戰死之秦元領保甲斬關遁京城陷衛士入都



亭驛執劉晏殺之丁巳奉道君皇帝寧德皇后入居延  
福宮命何鼎及濟王栩使金軍辛酉帝如青城十二月  
壬戌朔帝在青城蕭慶入居尚書省是日康王開大元  
帥府于相州癸亥帝至自青城甲子大索金帛丙寅遣  
陳過庭劉幹使兩河割地辛未定京師米價勸糴以振  
民癸酉斬行門指揮使蔣宣李福乙未康王如北京庚  
寅康王如東平

二年春正月辛卯朔命濟王栩景王杞出賀金軍金人

亦遣使入賀壬辰金人趣召康王還遣聶昌耿南仲陳  
過庭出割兩河地甲午詔兩河民開門出降庚子金人  
索金銀急何鼎及吏部侍郎李若水勸帝親至軍中以  
太子監國而行乙巳籍梁師成家丙午劉韜自經于金軍  
太學生徐揆上書金帥請帝還闕金人取至軍中死之  
是夜金人劫神衛營二月辛酉朔帝在青城丙寅金人  
塹南薰門路丁卯金人要上皇如青城盡取諸王孫入  
軍中辛未金人僞上皇召皇后皇太子入青城李若水死

之庚辰康王如濟州癸未觀文殿大學士唐恪自殺乙酉金人殺戶部尚書梅執禮侍郎陳知質刑部侍郎程振給事中安扶三月辛卯朔帝在青城丁酉金人立張邦昌為楚帝閤門宣贊舍人吳革死之丁巳金人脅上皇北行夏四月庚申朔金人以帝及皇后皇太子北行五月庚寅朔康王即位於南京遙上尊號曰孝慈淵聖皇帝紹興三十一年五月辛卯帝崩于五國城年六十四謚曰恭文順德仁孝皇帝廟號欽宗遙上陵名曰永

獻陵

欽宗靖康二年

右宋九主合一百六十七年



欽定續通志卷三十三